

Insecta.

*Habitat* in deserto aridissimo inter Iaicum et Irin, inter Glycirrhizam, cuius forte radicibus pascitur Larua.

62. CERAMBYX *Halodendri*.

Affinis C. Kaehleri, sed minor. Totus ater, poris excavatis punctatus. *Thorax* albid. lanugine pubescens, angulo utrinque obsoleto. *Elytra* atra, margine exteriori maculaque ovali baseos prope suturam rubris.

*Lectus* in Robinia Halodendro ad Irin.

63. CERAMBYX *floralis*.

*Magnitudo* supra Cerambycem, qui Leptura arcuata *Lin.* *Corpus* subtus totum pulcherrime citrinum. *Antennae* pedesque testacea, pulvere canescente pruinosa. *Caput* flavo annulatum; *thorax* flavus zona lata flava. *Elytra* nigra; fasciis pulcherrime flavis, transuersis, prima arcuata, tribus varie undulatis; apex elytrorum flavus. *Thorax* stridulus.

Colligitur in floribus, maxime Chetrandi montani; frequens in australioribus ad Iaicum et Irin.

64. LEPTURA *violacea*.

*Magnitudo* Lepturae aquaticae. *Caput*, *thorax*, *pectus* atro-subaenea; *elytra* latiuscula, obscure violaceo-coerulea. *Abdomen* sanguineum; *artus* nigri.

In sylvis Sibiriae borealioris circa Rosam et in Umbellatis frequens.

65. CICINDELA *caerulea*.

*Magnitudo* C. sylvaticae. *Os* uti congeneribus album. Caeterum corpus totum, artusque obscure, nitidissimeque coerulea, sericea, immaculata. Subtus et in pedibus pubescit pilis albis. Variat colore violaceo-atro et plane nigro.

In desertis arenosis australioribus ad Irin copiosissima, more generis fugax, raptuque viuens.

66. CICINDELA *gracilis*.

*Magnitudo* paulo infra C. germanicam; congeneribus omnibus gracilior. Fusco-nigra tota et subaenea, praesertim a dorso. *Elytra* punctis duobus marginalibus albis, uti C. germanica.